

Nahmiyāh

Nahmiyāh Yarūshalam ke lie Duā Kartā Hai

¹ Zail meñ Nahmiyāh bin Hakaliyāh kī riport darj hai.

Maiñ Artakḥshastā Bādshāh kī hukūmat ke 20weñ sāl Kislew ke mahīne meñ Sosan ke qile meñ thā ² ki ek din merā bhāi Hanānī mujh se milne āyā. Us ke sāth Yahūdāh ke chand ek ādmī the. Maiñ ne un se pūchhā, “Jo Yahūdī bach kar jilāwatanī se Yahūdāh wāpas gae haiñ un kā kyā hāl hai? Aur Yarūshalam Shahr kā kyā hāl hai?” ³ Unhoñ ne jawāb diyā, “Jo Yahūdī bach kar jilāwatanī se Yahūdāh wāpas gae haiñ un kā bahut burā aur zillatāmez hāl hai. Yarūshalam kī fasīl ab tak zamīnbos hai, aur us ke tamām darwāze rākh ho gae haiñ.”

⁴ Yih sun kar maiñ baiṭh kar rone lagā. Kāi din maiñ rozā rakh kar mātam kartā aur āsmān ke Ḳhudā se duā kartā rahā,

⁵ “Ai Rab, āsmān ke Ḳhudā, tū kitnā azīm aur mahīb Ḳhudā hai! Jo tujhe pyār aur tere ahkām kī pairawī karte haiñ un ke sāth tū apnā ahd qāym rakhtā aur un par mehrbānī kartā hai.

⁶ Merī bāt sun kar dhyān de ki terā ḳhādim kis tarah tujh se iltamās kar rahā hai. Din rāt maiñ Isrāīliyon ke lie jo tere ḳhādim haiñ duā kartā hūñ. Maiñ iqrār kartā hūñ ki ham ne terā gunāh kiyā hai. Is meñ maiñ aur mere bāp kā gharānā bhī shāmil hai. ⁷ Ham ne tere ḳhilāf nihāyat sharīr qadam uṭhāe haiñ, kyōñki jo ahkām aur

hidāyāt tū ne apne k̄hādīm Mūsā ko dī thīn ham un ke tābe na rahe. ⁸ Lekin ab wuh kuchh yād kar jo tū ne apne k̄hādīm ko farmāyā, ‘Agar tum bewafā ho jāo to main tumheñ muḳhtalif qaumoñ meñ muntashir kar dūngā, ⁹ lekin agar tum mere pās wāpas ā kar dubārā mere ahkām ke tābe ho jāo to main tumheñ tumhāre watan meñ wāpas lāūngā, k̄hāh tum zamīn kī intahā tak kyoñ na pahuñch gae ho. Main tumheñ us jagah wāpas lāūngā jise main ne chun liyā hai tāki merā nām wahān sukūnat kare.’ ¹⁰ Ai Rab, yih log to tere apne k̄hādīm haiñ, terī apnī qaum jise tū ne apnī azīm qudrat aur qawī hāth se fidyā de kar chhurāyā hai. ¹¹ Ai Rab, apne k̄hādīm aur un tamām k̄hādīmoñ kī iltamās sun jo pūre dil se tere nām kā k̄hauf mānte haiñ. Jab terā k̄hādīm āj shahanshāh ke pās hogā to use kāmyābī atā kar. Baḳsh de kī wuh mujh par rahm kare.”

Main ne yih is lie kahā ki main shahanshāh kā sāqī thā.

2

Nahmiyāh ko Yarūshalam Jāne kī Ijāzat Milti Hai

¹ Chār mahīne guzar gae. Nīsān ke mahīne ke ek dīn jab main Shahanshāh Artakhsastā ko mai pilā rahā thā to merī māyūsī use nazar āī. Pahle us ne mujhe kabhī udās nahīn dekhā thā, ² is lie us ne pūchhā, “Āp itne ḡhamgīn kyoñ dikhāī de rahe haiñ? Āp bīmār to nahīn lagte balki koī bāt āp ke dil ko tang kar rahī hai.”

Main saḡht ghabrā gayā ³ aur kahā, “Shahanshāh abad tak jītā rahe! Main kis tarah ḡhush ho saktā hūn? Jis shahr meñ mere bāpdādā ko dafnāyā gayā hai wuh malbe kā ḡher hai, aur us ke darwāze rākh ho gae haiñ.”

⁴ Shahanshāh ne pūchhā, “To phir main kis tarah āp kī madad karūn?” Ḳhāmoshī se āsmān ke Ḳhudā se duā karke ⁵ main ne shahanshāh se kahā, “Agar bāt āp ko manzūr ho aur āp apne ḡhādīm se ḡhush hoñ to phir barāh-e-karm mujhe Yahūdāh ke us shahr bhej dījīe jis meñ mere bāpdādā dafn hue haiñ tāki main use dubārā tāmīr karūn.”

⁶ Us waqt malikā bhī sāth baiṡhī thī. Shahanshāh ne sawāl kiyā, “Safr ke lie kitnā waqt darkār hai? Āp kab tak wāpas ā sakte haiñ?” Main ne use batāyā ki main kab tak wāpas āūngā to wuh muttafiq huā. ⁷ Phir main ne guzārish kī, “Agar bāt āp ko manzūr ho to mujhe Dariyā-e-Furāt ke maḡhribī ilāqe ke gawarnarōñ ke lie ḡhat dījīe tāki wuh mujhe apne ilāqōñ meñ se guzarne deñ aur main salāmatī se Yahūdāh tak pahuñch sakūn. ⁸ Is ke alāwā shāhī janglāt ke nigarān Āsaf ke lie ḡhat likhwāeñ tāki wuh mujhe lakaṡī de. Jab main Rab ke ghar ke sāth wāle qile ke darwāze, fasīl aur apnā ghar banāūngā to mujhe shahtiroñ kī zarūrat hogī.” Allāh kā shafiq hāth mujh par thā, is lie shahanshāh ne mujhe yih ḡhat de die.

⁹ Shahanshāh ne faujī afsar aur ghurṡawār bhī mere sāth bheje. Yoñ rawānā ho kar main Dariyā-e-Furāt ke maḡhribī ilāqe ke

gawarnaron̄ ke pās pahuñchā aur unheñ sha-hanshāh ke khat die. ¹⁰ Jab Gawarnar Sanballat Haurūnī aur Ammonī afsar Tūbiyāh ko mālūm huā ki koī Isrāīliyon̄ kī bahbūdī ke lie ā gayā hai to wuh nihāyat nāk̄hush hue.

Nahmiyāh Fasīl kā Muāynā Kartā Hai

¹¹ Safr karte karte maiñ Yarūshalam pahuñch gayā. Tīn din ke bād ¹² maiñ rāt ke waqt shahr se niklā. Mere sāth chand ek ādmī the, aur hamāre pās sirf wuhī jānwar thā jis par maiñ sawār thā. Ab tak maiñ ne kisī ko bhī us bojh ke bāre meñ nahīn batāyā thā jo mere K̄hudā ne mere dil par Yarūshalam ke lie ḍāl diyā thā. ¹³ Chunānche maiñ andhere meñ Wādī ke Darwāze se shahr se niklā aur junūb kī taraf Azhdāhe ke Chashme se ho kar Kachre ke Darwāze tak pahuñchā. Har jagah maiñ ne girī huī fasīl aur bhasm hue darwāzon̄ kā muāynā kiyā. ¹⁴ Phir maiñ shimāl yānī Chashme ke Darwāze aur Shāhī Tālāb kī taraf bar̄hā, lekin malbe kī kasrat kī wajah se mere jānwar ko guzarne kā rāstā na milā, ¹⁵ is lie maiñ Wādī-e-Qidron meñ se guzarā. Ab tak andherā hī andherā thā. Wahān bhī maiñ fasīl kā muāynā kartā gayā. Phir maiñ muṛā aur Wādī ke Darwāze meñ se dubārā shahr meñ dāk̄hil huā.

Fasīl ko Tāmīr Karne kā Faislā

¹⁶ Yarūshalam ke afsaron̄ ko mālūm nahīn thā ki maiñ kahān gayā aur kyā kar rahā thā. Ab tak maiñ ne na unheñ aur na imāmon̄ yā dīgar un logoñ ko apne mansūbe se āgāh kiyā thā jinheñ tāmīr kā yih kām karnā thā. ¹⁷ Lekin ab

maiñ un se muḵhātib huā, “Āp ko ḵhud hamārī musibat nazar ātī hai. Yarūshalam malbe kā ḍher ban gayā hai, aur us ke darwāze rākh ho gae haiñ. Āeñ, ham fasīl ko nae sire se tāmīr karen̄ tāki ham dūsroñ ke mazāq kā nishānā na bane raheñ.”¹⁸ Maiñ ne unheñ batāyā ki Allāh kā shafīq hāth kis tarah mujh par rahā thā aur ki shahanshāh ne mujh se kis qism kā wādā kiyā thā. Yih sun kar unhoñ ne jawāb diyā, “Thīk hai, āeñ ham tāmīr kā kām shurū karen̄!” Chunāñche wuh is achchhe kām meñ lag gae.

¹⁹ Jab Sanballat Haurūnī, Ammonī afsar Tūbiyāh aur Jasham Arabī ko is kī ḵhabar milī to unhoñ ne hamārā mazāq urā kar hiqāratāmez lahje meñ kahā, “Yih tum log kyā kar rahe ho? Kyā tum shahanshāh se ḡhaddārī karnā chāhte ho?”²⁰ Maiñ ne jawāb diyā, “Āsmān kā Ḳhudā hameñ kāmyābī atā karegā. Ham jo us ke ḵhādīm haiñ tāmīr kā kām shurū karenge. Jahān tak Yarūshalam kā tālluq hai, na āj aur na mazī meñ āp kā kabhī koī hissā yā haq thā.”

3

Fasīl kī Tāmīr-e-Nau

¹ Imām-e-āzam Iliyāsib bāqī imāmoñ ke sāth mil kar tāmīrī kām meñ lag gayā. Unhoñ ne Bher ke Darwāze ko nae sire se banā diyā aur use maḵhsūs karke us ke kiwār lagā die. Unhoñ ne fasīl ke sāth wāle hisse ko bhī Miyā Burj aur Hananel ke Burj tak banā kar maḵhsūs kiyā.

² Yarīhū ke ādmiyoñ ne fasīl ke agle hisse ko kharā kiyā jabki Zakkūr bin Imrī ne un ke hisse se mulhiq hisse ko tāmīr kiyā.

³ Machhlī kā darwāzā Sanā'āh ke khāndān kī zimmedārī thī. Use shahtīroñ se banā kar unhoñ ne kiwār, chaṭakhniyāñ aur kuñḍe lagā die.

⁴ Agle hisse kī marammat Marīmot bin Ūriyāh bin Haqqūz ne kī. Aglā hissā Masullām bin Barakiyāh bin Mashezabel kī zimmedārī thī.

Sadoq bin Bānā ne agle hisse ko tāmīr kiyā.

⁵ Aglā hissā Taqua ke bāshindoñ ne banāyā. Lekin shahr ke baṛe log apne buzurgoñ ke taht kām karne ke lie taiyār na the.

⁶ Yasānā kā Darwāzā Yoyadā bin Fāsīh aur Masullām bin Basūdiyāh kī zimmedārī thī. Use shahtīroñ se banā kar unhoñ ne kiwār, chaṭakhniyāñ aur kuñḍe lagā die.

⁷ Aglā hissā Malatiyāh Jibaūnī aur Yadūn Marūnotī ne khaṛā kiyā. Yih log Jibaūn aur Misfāh ke the, wuhī Misfāh jahāñ Dariyā-e-Furāt ke maḡhribī ilāqe ke gawarnar kā dārul-hukūmat thā.

⁸ Agle hisse kī marammat ek sunār banām Uzziyel bin Harhiyāh ke hāth meñ thī.

Agle hisse par ek itarsāz banām Hananiyāh muqarrar thā. In logoñ ne fasīl kī marammat 'Moṭī Dīwār' tak kī.

⁹ Agle hisse ko Rifāyāh bin Hūr ne khaṛā kiyā. Yih ādmī zile Yarūshalam ke ādhe hisse kā afsar thā.

¹⁰ Yadāyāh bin Harūmaf ne agle hisse kī marammat kī jo us ke ghar ke muqābil thā.

Agle hisse ko Hattūsh bin Hasabniyāh ne tāmīr kiyā.

¹¹ Agle hisse ko Tanūroñ ke Burj tak Malkiyāh bin Hārim aur Hassūb bin Pakhat-moāb ne kharā kiyā.

¹² Aglā hissā Sallūm bin Hallūhesh kī zimmedārī thī. Yih ādmī zile Yarūshalam ke dūsre ādhe hisse kā afsar thā. Us kī beṭiyon ne us kī madad kī.

¹³ Hanūn ne Zanūh ke bāshindon samet Wādī ke Darwāze ko tāmīr kiyā. Shahtīron se use banā kar unhoñ ne kiwār, chaṭaḱhniyāñ aur kunde lagāe. Is ke alāwā unhoñ ne fasīl ko wahāñ se Kachre ke Darwāze tak kharā kiyā. Is hisse kā fasīlā taqriban 1,500 fuṭ yāñī ādhā kilomīṭar thā.

¹⁴ Kachre kā Darwāzā Malkiyāh bin Raikāb kī zimmedārī thī. Yih ādmī zile Bait-karm kā afsar thā. Us ne use banā kar kiwār, chaṭaḱhniyāñ aur kunde lagāe.

¹⁵ Chashme ke Darwāze kī tāmīr Sallūn bin Kulhozā ke hāth meñ thī jo zile Misfāh kā afsar thā. Us ne darwāze par chhat banā kar us ke kiwār, chaṭaḱhniyāñ aur kunde lagā die. Sāth sāth us ne fasīl ke us hisse kī marammat kī jo Shāhī Bāgh ke pās wāle tālāb se guzartā hai. Yih wuhī tālāb hai jis meñ pāñī nāle ke zariye pahuñchtā hai. Sallūn ne fasīl ko us sīrhī tak tāmīr kiyā jo Yarūshalam ke us hisse se utartī hai jo ‘Dāūd kā Shahr’ kahlātā hai.

¹⁶ Aglā hissā Nahmiyāh bin Azbuq kī zimmedārī thī jo zile Bait-sūr ke ādhe hisse kā afsar thā. Fasīl kā yih hissā Dāūd Bādshāh ke qabristān ke muqābil thā aur masnūī tālāb aur sūrmāon ke kamron par khatm huā.

¹⁷ Zail ke Lāwiyon ne agle hisson ko kharā kiyā: Pahle Rahūm bin Bāñī kā hissā thā.

Zile Qailā ke ādhe hisse ke afsar Hasbiyāh ne agle hisse kī marammat kī. ¹⁸ Agle hisse ko Lāwiyōñ ne Binnūi bin Hanadād ke zer-e-nigarāñi kharā kiyā jo zile Qailā ke dūsre ādhe hisse par muqarrar thā.

¹⁹ Aglā hissā Misfāh ke sardār Azar bin Yashua kī zimmedārī thī. Yih hissā fasīl ke us moṛ par thā jahāñ rāstā aslāhkhāne kī taraf charhtā hai.

²⁰ Agle hisse ko Bārūk bin Zabbī ne baṛī mehnat se tāmīr kiyā. Yih hissā fasīl ke moṛ se shurū ho kar imām-e-āzam Iliyāsib ke ghar ke darwāze par khatm huā.

²¹ Aglā hissā Marīmot bin Ūriyāh bin Haqqūz kī zimmedārī thī aur Iliyāsib ke ghar ke darwāze se shurū ho kar us ke kone par khatm huā.

²² Zail ke hisse un imāmoñ ne tāmīr kie jo shahr ke gird-o-nawāh meñ rahte the.

²³ Agle hisse kī tāmīr Binyamīn aur Hassūb ke zer-e-nigarāñi thī. Yih hissā un ke gharoñ ke sāmne thā.

Azariyāh bin Māsiyāh bin Ananiyāh ne agle hisse kī marammat kī. Yih hissā us ke ghar ke pās hī thā.

²⁴ Aglā hissā Binnūi bin Hanadād kī zimmedārī thī. Yih Azariyāh ke ghar se shurū huā aur muṛte muṛte kone par khatm huā.

²⁵ Aglā hissā Fālāl bin Ūzī kī zimmedārī thī. Yih hissā moṛ se shurū huā, aur ūpar kā jo burj shāhī mahal se us jagah nikaltā hai jahāñ muhāfizoñ kā sahan hai wuh bhī is meñ shāmil thā.

Aglā hissā Fidāyāh bin Parūs ²⁶ aur Ofal Pahārī par rahne wāle Rab ke ghar ke k̄hidmatgāroñ

ke zimme thā. Yih hissā Pānī ke Darwāze aur wahān se nikle hue burj par khatm huā.

²⁷ Aglā hissā is burj se le kar Ofal Pahārī kī dīwār tak thā. Taqua ke bāshindoñ ne use tāmīr kiyā.

²⁸ Ghoṛe ke Darwāze se āge imāmoñ ne fasīl kī marammat kī. Har ek ne apne ghar ke sāmne kā hissā khaṛā kiyā.

²⁹ Un ke bād Sadoq bin Immer kā hissā āyā. Yih bhī us ke ghar ke muqābil thā.

Aglā hissā Samāyāh bin Sakaniyāh ne khaṛā kiyā. Yih ādmī Mashriqī Darwāze kā pahredār thā.

³⁰ Aglā hissā Hananiyāh bin Salamiyāh aur Salaf ke chhate beṭe Hanūn ke zimme thā.

Aglā hissā Masullām bin Barakiyāh ne tāmīr kiyā jo us ke ghar ke muqābil thā.

³¹ Ek sunār banām Malkiyāh ne agle hisse kī marammat kī. Yih hissā Rab ke ghar ke k̄hidmatgāroñ aur tājīroñ ke us makān par k̄hatm huā jo Pahre ke Darwāze ke sāmne thā. Fasīl ke kone par wāqe bālākhānā bhī is meñ shāmīl thā.

³² Ākhirī hissā Bheṛ ke Darwāze par k̄hatm huā. Sunāroñ aur tājīroñ ne use khaṛā kiyā.

4

Sanballat Yahūdiyoñ kā Mazāq Uṛātā Hai

¹ Jab Sanballat ko patā chalā ki ham fasīl ko dubārā tāmīr kar rahe haiñ to wuh āg-bagūlā ho gayā. Hamārā mazāq uṛā uṛā kar ² us ne apne hamk̄hidmat afsaroñ aur Sāmariya ke faujiyoñ kī maujūdagī meñ kahā, “Yih zaīf Yahūdī kyā

kar rahe haiñ? Kyā yih wāqaī Yarūshalam kī qilābandī karnā chāhte haiñ? Kyā yih samajhte haiñ ki chand ek qurbāniyān pesh karke ham fasīl ko āj hī kharā kareñge? Wuh in jale hue pattharon aur malbe ke is dher se kis tarah naī dīwār banā sakte haiñ?”³ Ammonī afsar Tūbiyāh us ke sāth kharā thā. Wuh bolā, “Unheñ karne do! Dīwār itnī kamzor hogī ki agar lomrī bhī us par chhalāng lagāe to gir jāegī.”

⁴ Ai hamāre Ḳhudā, hamārī sun, kyonki log hameñ haqīr jānte haiñ. Jin bāton se unhoñ ne hameñ zalīl kiyā hai wuh un kī zillat kā bāis ban jāeñ. Baḳsh de ki log unheñ lūt leñ aur unheñ qaid karke jilāwatan kar deñ.⁵ Un kā qusūr nazarandāz na kar balki un ke gunāh tujhe yād raheñ. Kyonki unhoñ ne fasīl ko tāmīr karne wālon ko zalīl karne se tujhe taish dilāyā hai.

⁶ Muḳhālafat ke bāwujūd ham fasīl kī marammat karte rahe, aur hote hote pūrī dīwār kī ādhī ūnchāī kharī huī, kyonki log pūrī lagan se kām kar rahe the.

Dushman ke Hamloñ kī Mudāfa'at

⁷ Jab Sanballat, Tūbiyāh, Araboñ, Ammoniyon aur Ashdūd ke bāshindoñ ko ittalā milī ki Yarūshalam kī fasīl kī tāmīr meñ taraqqī ho rahī hai balki jo hisse ab tak khare na ho sake the wuh bhī band hone lage haiñ to wuh baḳe ḡhusse meñ ā gae.⁸ Sab muttahid ho kar Yarūshalam par hamlā karne aur us meñ garbaḳ paidā karne kī sāzishēñ karne lage.⁹ Lekin ham ne apne Ḳhudā se iltamās karke pahredār lagāe jo hameñ din rāt un se bachāe rakheñ.

10 Us waqt Yahūdāh ke log karāhne lage, “Mazdūroṅ kī tāqat khatm ho rahī hai, aur abhī tak malbe ke bare dher bāqī haiṅ. Fasīl ko banānā hamāre bas kī bāt nahīṅ hai.”

11 Dūsri taraf dushman kah rahe the, “Ham achānak un par tūṭ parēṅge. Un ko us waqt patā chalegā jab ham un ke bīch meṅ hoṅge. Tab ham unheṅ mār deṅge aur kām ruk jāegā.”

12 Jo Yahūdī un ke qarīb rahte the wuh bār bār hamāre pās ā kar hamēṅ ittalā dete rahe, “Dushman chāroṅ taraf se āp par hamlā karne ke lie taiyār kharā hai.”

13 Tab main ne logoṅ ko fasīl ke pīchhe ek jagah kharā kar diyā jahān dīwār sab se nīchī thī, aur wuh talwāroṅ, nezoṅ aur kamānoṅ se lais apne khandānoṅ ke mutābiq khule maidān meṅ kharē ho gae. 14 Logoṅ kā jāyzā le kar main kharā huā aur kahne lagā, “Un se mat dareṅ! Rab ko yād kareṅ jo azīm aur mahīb hai. Zahan meṅ rakheṅ ki ham apne bhāiyōṅ, beṅoṅ beṅiyōṅ, bīwiyoṅ aur gharoṅ ke lie laṅ rahe haiṅ.”

15 Jab hamāre dushmanoṅ ko mālūm huā ki un kī sāzishoṅ kī khabar ham tak pahuṅch gāī hai aur ki Allāh ne un ke mansūbe ko nākām hone diyā to ham sab apnī apnī jagah par dubārā tāmīr ke kām meṅ lag gae. 16 Lekin us dīn se mere jawānoṅ kā sirf ādhā hissā tāmīrī kām meṅ lagā rahā. Bāqī log nezoṅ, dhāloṅ, kamānoṅ aur zirābaktar se lais pahrā dete rahe. Afsar Yahūdāh ke un tamām logoṅ ke pīchhe kharē rahe 17 jo dīwār ko tāmīr kar rahe the. Sāmān uṭhāne wāle ek hāth se hathiyār pakare kām

karte the. ¹⁸ Aur jo bhī dīwār ko khaṛā kar rahā thā us kī talwār kamr meñ bandhī rahtī thī. Jis ādmī ko turam bajā kar khatre kā elān karnā thā wuh hameshā mere sāth rahā. ¹⁹ Maiñ ne shurafā, buzurgoñ aur bāqī logoñ se kahā, “Yih kām bahut hī baṛā aur wasī hai, is lie ham ek dūsre se dūr aur bikhre hue kām kar rahe haiñ. ²⁰ Jyoñ hī āp ko turam kī āwāz sunāi de to bhāg kar āwāz kī taraf chale aēñ. Hamārā Kḥudā hamāre lie laṛegā!”

²¹ Ham pau phaṭne se le kar us waqt tak kām meñ masrūf rahte jab tak sitāre nazar na āte, aur har waqt ādmiyoñ kā ādhā hissā neze pakāṛe pahrā detā thā. ²² Us waqt maiñ ne sab ko yih hukm bhī diyā, “Har ādmī apne madadgāroñ ke sāth rāt kā waqt Yarūshalām meñ guzāre. Phir āp rāt ke waqt pahrādārī meñ bhī madad kareñge aur dīn ke waqt tāmīrī kām meñ bhī.” ²³ Un tamām dinoñ ke daurān na maiñ, na mere bhāiyoñ, na mere jawānoñ aur na mere pahredāroñ ne kabhī apne kapṛe utāre. Nīz, har ek apnā hathiyār pakāṛe rahā.

5

Ġharīboñ kā Qarzā Mansūkh

¹ Kuchh der bād kuchh mard-o-khawātīn mere pās ā kar apne Yahūdī bhāiyoñ kī shikāyat karne lage. ² Bāz ne kahā, “Hamāre bahut zyādā beṭe-beṭiyāñ haiñ, is lie hameñ mazīd anāj milnā chāhie, warnā ham zindā nahīñ raheñge.” ³ Dūsroñ ne shikāyat kī, “Kāl ke daurān hameñ apne khetoñ, angūr ke bāghoñ aur gharoñ ko girwī rakhnā paṛā tāki anāj mil jāe.” ⁴ Kuchh aur

bole, “Hameñ apne khetoñ aur angūr ke bāghoñ par bādshāh kā ṭaiks adā karne ke lie udhār lenā parā. ⁵ Ham bhī dūsroñ kī tarah Yahūdī qaum ke haiñ, aur hamāre bachche un se kam haiyat nahīñ rakhte. To bhī hameñ apne bachchoñ ko ghulāmī meñ bechnā partā hai tāki guzārā ho sake. Hamārī kuchh beṭiyāñ laundiyāñ ban chukī haiñ. Lekin ham khud bebas haiñ, kyonki hamāre khet aur angūr ke bāgh dūsroñ ke qabze meñ haiñ.”

⁶ Un kā wāwailā aur shikāyateñ sun kar mujhe baṛā ghussā āyā. ⁷ Bahut soch-bichār ke bād maiñ ne shurafā aur afsaroñ par ilzām lagāyā, “Āp apne hamwatan bhāiyōñ se ghairmunāsib sūd le rahe haiñ!” Maiñ ne un se nipaṭne ke lie ek baṛī jamāt ikaṭṭhī karke ⁸ kahā, “Hamāre kā hamwatan bhāiyōñ ko Ghairyahūdiyōñ ko bechā gayā thā. Jahān tak mumkin thā ham ne unheñ wāpas kharīd kar āzād karne kī koshish kī. Aur ab āp khud apne hamwatan bhāiyōñ ko bech rahe haiñ. Kyā ham ab unheñ dubārā wāpas kharīdeñ?” Wuh khāmosh rahe aur koī jawāb na de sake.

⁹ Maiñ ne bāt jāri rakhī, “Āp kā yih sulūk ṭhīk nahīñ. Āp ko hamāre Khudā kā khauf mān kar zindagī guzārā chāhie tāki ham apne Ghairyahūdī dushmanoñ kī lān-tān kā nishānā na baneñ. ¹⁰ Maiñ, mere bhāiyōñ aur mulāzimoñ ne bhī dūsroñ ko udhār ke taur par paise aur anāj diyā hai. Lekin āeñ, ham un se sūd na leñ! ¹¹ Āj hī apne qarzdāroñ ko un ke khet, ghar aur angūr aur zaitūn ke bāgh wāpas kar deñ. Jitnā sūd āp ne lagāyā thā use bhī

wāpas kar deñ, khāh use paisoñ, anāj, tāzā mai yā zaitūn ke tel kī sūrat meñ adā karnā ho.”
¹² Unhoñ ne jawāb diyā, “Ham use wāpas kar deñge aur āindā un se kuchh nahīn māñgeñge. Jo kuchh āp ne kahā wuh ham kareñge.”

Tab maiñ ne imāmoñ ko apne pās bulāyā tāki shurafā aur buzurg un kī maujūdagī meñ kasm khāeñ ki ham aisā hī kareñge. ¹³ Phir maiñ ne apne libās kī taheñ jhār jhār kar kahā, “Jo bhī apnī qasam toṛe use Allāh isī tarah jhār kar us ke ghar aur milkiyat se mahrūm kar de!”

Tamām jamāshudā log bole, “Āmīn, aisā hī ho!” Aur Rab kī tārīf karne lage. Sab ne apne wāde pūre kie.

Nahmiyāh kā Achchhā Namūnā

¹⁴ Maiñ kul bārah sāl sūbā Yahūdāh kā gawarnar rahā yānī Artakshshastā Bādshāh kī hukūmat ke 20weñ sāl se us ke 32weñ sāl tak. Is pūre arse meñ na maiñ ne aur na mere bhāiyōñ ne wuh āmdanī lī jo hamāre lie muqarrar kī gāī thī. ¹⁵ Asal meñ māzī ke gawarnaroñ ne qaum par barā bojh ḍāl diyā thā. Unhoñ ne riāyā se na sirf roṭī aur mai balki fī din chāndī ke 40 sikke bhī lie the. Un ke afsaroñ ne bhī ām logoñ se ghalat fāydā uṭhāyā thā. Lekin chūñki maiñ Allāh kā khauf māntā thā, is lie maiñ ne un se aisā sulūk na kiyā. ¹⁶ Merī pūrī tāqat fasīl kī takmīl meñ sarf huī, aur mere tamām mulāzim bhī is kām meñ sharīk rahe. Ham meñ se kisī ne bhī zamīn na kharīdī. ¹⁷ Maiñ ne kuchh na māñgā hālāñki mujhe rozānā Yahūdāh ke 150 afsaroñ kī mehmān-nawāzī karnī partī thī. Un meñ wuh tamām mehmān shāmil nahīn

haiñ jo gāhe bagāhe paṛosī mamālik se āte rahe. ¹⁸ Rozānā ek bail, chhih behtarīn bher-bakriyāñ aur bahut-se parinde mere lie zabah karke taiyār kie jāte, aur das das din ke bād hamēñ kaī qism kī bahut-sī maī kharīdnī paṛtī thī. In aḡhrājāt ke bāwujūd maiñ ne gawarnar ke lie muqarrarā wazīfā na māngā, kyonki qaum par bojh waise bhī bahut zyādā thā.

¹⁹ Ai mere Ḳhudā, jo kuchh maiñ ne is qaum ke lie kiyā hai us ke bāis mujh par mehrbānī kar.

6

Nahmiyāh ke ḡhilāf Sāzish

¹ Sanballat, Tūbiyāh, Jasham Arabī aur hamāre bāqī dushmanoñ ko patā chalā ki maiñ ne fasīl ko takmīl tak pahuñchāyā hai aur dīwār meñ kahīñ bhī ḡhālī jagah nazar nahīñ ātī. Sirf darwāzoñ ke kiwār ab tak lagāe nahīñ gae the.

² Tab Sanballat aur Jasham ne mujhe paighām bhejā, “Ham Wādī-e-Onūs ke shahr Kafīrīm meñ āp se milnā chāhte haiñ.” Lekin mujhe mālūm thā ki wuh mujhe nuqsān pahuñchānā chāhte haiñ. ³ Is lie maiñ ne qāsidoñ ke hāth jawāb bhejā, “Maiñ is waqt ek baṛā kām takmīl tak pahuñchā rahā hūñ, is lie maiñ ā nahīñ saktā. Agar maiñ āp se milne āūñ to pūrā kām ruk jāegā.”

⁴ Chār dafā unhoñ ne mujhe yihī paighām bhejā aur har bār maiñ ne wuhī jawāb diyā.

⁵ Pāñchweñ martabā jab Sanballat ne apne mulāzim ko mere pās bhejā to us ke hāth meñ ek khulā ḡhat thā. ⁶ Ḳhat meñ likhā thā, “Paṛosī

mamālik meñ afwāh phail gaī hai ki āp aur bāqī Yahūdī baġhāwat kī taiyāriyāñ kar rahe haiñ. Jasham ne is bāt kī tasdīq kī hai. Log kahte haiñ ki isī wajah se āp fasīl banā rahe haiñ. In riportoñ ke mutābiq āp un ke bādshāh baneñge. ⁷ Kahā jātā hai ki āp ne nabiyoñ ko muqarrar kiyā hai jo Yarūshalām meñ elān karen ki āp Yahūdāh ke bādshāh haiñ. Beshak aisī afwāheñ shahanshāh tak bhī pahuñcheñgī. Is lie aēñ, ham mil kar ek dūsre se mashwarā karen ki kyā karnā chāhie.”

⁸ Maiñ ne use jawāb bhejā, “Jo kuchh āp kah rahe haiñ wuh jhūṭ hī jhūṭ hai. Kuchh nahīñ ho rahā, balki āp ne farzī kahāñī ghar lī hai!”

⁹ Asal meñ dushman hameñ ḍarāñā chāhte the. Unhoñ ne sochā, “Agar ham aisī bāteñ kahañ to wuh himmat hār kar kām se bāz aēñge.” Lekin ab maiñ ne zyādā azm ke sāth kām jāri rakhā.

¹⁰ Ek din maiñ Samāyāh bin Dilāyāh bin Mahetabel se milne gayā jo tālā lagā kar ghar meñ baiṭhā thā. Us ne mujh se kahā, “Aēñ, ham Allāh ke ghar meñ jamā ho jāeñ aur darwāzoñ ko apne pīchhe band karke kunḍī lagāeñ. Kyonki log isī rāt āp ko qatl karne ke lie aēñge.”

¹¹ Maiñ ne etarāz kiyā, “Kyā yih ṭhīk hai ki mujh jaisā ādmī bhāg jāe? Yā kyā mujh jaisā shakhs jo imām nahīñ hai Rab ke ghar meñ dākḥil ho kar zindā rah saktā hai? Hargiz nahīñ! Maiñ aisā nahīñ karūñga!” ¹² Maiñ ne jāñ liyā ki Samāyāh kī yih bāt Allāh kī taraf se nahīñ hai. Sanballat aur Tūbiyāh ne use rishwat dī thī, isī lie us ne mere bāre meñ aisī peshgoī kī thī. ¹³ Is se wuh mujhe ḍarā kar gunāh karne par uksāñā

chāhte the tāki wuh merī badnāmī karke mujhe mazāq kā nishānā banā sakeñ.

¹⁴ Ai mere Ḳhudā, Tūbiyāh aur Sanballat kī yih burī harkateñ mat bhūlnā! Nauadiyāh nabiya aur bāqī un nabiyoñ ko yād rakh jinhoñ ne mujhe ḍarāne kī koshish kī hai.

Fasīl kī Takmīl

¹⁵ Fasīl ilūl ke mahīne ke 25weñ din * yānī 52 dinoñ meñ mukammal huī. ¹⁶ Jab hamāre dushmanoñ ko yih ḳhabar milī to paṛosī mamālik saham gae. Aur wuh ehsās-e-kamtarī kā shikār ho gae. Unhoñ ne jān liyā ki Allāh ne ḳhud yih kām takmīl tak pahuñchāyā hai.

¹⁷ Un 52 dinoñ ke daurān Yahūdāh ke shurafā Tūbiyāh ko ḳhat bhejte rahe aur us se jawāb milte rahe the. ¹⁸ Asal meñ Yahūdāh ke bahut-se logoñ ne ḳasam khā kar us kī madad karne kā wādā kiyā thā. Wajah yih thī ki wuh Sakaniyāh bin Araḳh kā dāmād thā, aur us ke beṭe Yūhanān kī shādī Masullām bin Barakiyāh kī beṭī se huī thī. ¹⁹ Tūbiyāh ke yih madadgār mere sāmne us ke nek kāmōñ kī tārīf karte rahe aur sāth sāth merī har bāt use batāte rahe. Phir Tūbiyāh mujhe ḳhat bhejtā tāki main ḍar kar kām se bāz āūñ.

7

¹ Fasīl kī takmīl par main ne darwāzoñ ke kiwār lagwāe. Phir Rab ke ghar ke darbān, gulūkār aur ḳhidmatguzār Lāwī muḳarrar kie gae. ² Main ne do ādmiyoñ ko Yarūshalam ke hukmrān banāyā. Ek merā bhāī Hanānī

* 6:15 2 Aktūbar.

aur dūsra qile kā kamāṇḍar Hananiyāh thā. Hananiyāh ko main ne is lie chun liyā ki wuh wafādār thā aur aksar logon kī nisbat Allāh kā zyādā khauf māntā thā. ³ Main ne donoñ se kahā, “Yarūshalam ke darwāze dopahar ke waqt jab dhūp kī shiddat hai khule na raheñ, aur pahrā dete waqt bhī unheñ band karke kunde lagāeñ. Yarūshalam ke ādmiyon ko pahrādārī ke lie muqarrar kareñ jin meñ se kuchh fasīl par aur kuchh apne gharon ke sāmne hī pahrā deñ.”

Jilāwatanī se Wāpas Āe Huon kī Fahrīst

⁴ Go Yarūshalam Shahr baṛā aur wasī thā, lekin us meñ ābādī thoṛī thī. Dhāe gae makān ab tak dubārā tāmīr nahīñ hue the. ⁵ Chunāñche mere Kḥudā ne mere dil ko shurafā, afsaron aur awām ko ikatṭhā karne kī tahrīk dī tāki kḥāndānon kī rajīstṛī taiyār karūñ. Is silsile meñ mujhe ek kitāb mil gāi jis meñ un logon kī fahrīst darj thī jo ham se pahle jilāwatanī se wāpas āe the. Us meñ likhā thā,

⁶ “Zail meñ Yahūdāh ke un logon kī fahrīst hai jo jilāwatanī se wāpas āe. Bābal kā bādshāh Nabūkadnazzar unheñ qaid karke Bābal le gayā thā, lekin ab wuh Yarūshalam aur Yahūdāh ke un shahron meñ phir jā base jahāñ pahle rahte the.

⁷ Un ke rāhnumā Zarubbābal, Yashua, Nahmiyāh, Azariyāh, Rāmiyāh, Nahmānī, Mardakī, Bilshān, Misfarat, Bigwī, Nahūm aur Bānā the.

Zail kī fahrīst meñ wāpas āe hue kḥāndānon ke mard bayān kie gae haiñ.

⁸ Parūs kā kḥāndān: 2,172,

⁹ Safatiyāh kā kḥāndān: 372,

- 10 Arakh kā ḵhāndān: 652,
 11 Pakhat-moāb kā ḵhāndān yānī Yashua aur
 Yoāb kī aulād: 2,818,
 12 Ailām kā ḵhāndān: 1,254,
 13 Zattū kā ḵhāndān: 845,
 14 Zakkī kā ḵhāndān: 760,
 15 Binnūī kā ḵhāndān: 648,
 16 Babī kā ḵhāndān: 628,
 17 Azjād kā ḵhāndān: 2,322,
 18 Adūniqām kā ḵhāndān: 667,
 19 Bigwī kā ḵhāndān: 2,067,
 20 Adīn kā ḵhāndān: 655,
 21 Atīr kā ḵhāndān yānī Hizqiyāh kī aulād: 98,
 22 Hāshūm kā ḵhāndān: 328,
 23 Bazī kā ḵhāndān: 324,
 24 Ḵhārif kā ḵhāndān: 112,
 25 Jibaūn kā ḵhāndān: 95,
 26 Bait-laham aur Natūfā ke bāshinde: 188,
 27 Anatot ke bāshinde: 128,
 28 Bait-azmāwat ke bāshinde: 42,
 29 Qiriyat-yārīm, Kafīrā aur Bairot ke
 bāshinde: 743,
 30 Rāmā aur Jibā ke bāshinde: 621,
 31 Mikmās ke bāshinde: 122,
 32 Baitel aur Aī ke bāshinde: 123,
 33 Dūsre Nabū ke bāshinde: 52,
 34 Dūsre Ailām ke bāshinde: 1,254,
 35 Hārim ke bāshinde: 320,
 36 Yarīhū ke bāshinde: 345,
 37 Lūd, Hādīd aur Onūs ke bāshinde: 721,
 38 Sanā'āh ke bāshinde: 3,930.
 39 Zail ke imām jilāwatanī se wāpas āe.
 Yadāyāh kā ḵhāndān jo Yashua kī nasl kā thā:
 973,

⁴⁰ Immer kā ḵhāndān: 1,052,

⁴¹ Fashhūr kā ḵhāndān: 1,247,

⁴² Hārim kā ḵhāndān: 1,017.

⁴³ Zail ke Lāwī jilāwatanī se wāpas āe.

Yashua aur Qadmiyel kā ḵhāndān yānī
Hūdāwiyāh kī aulād: 74,

⁴⁴ Gulūkār: Āsaf ke ḵhāndān ke 148 ādmī,

⁴⁵ Rab ke ghar ke darbān: Sallūm, Atīr,
Talmūn, Aqqūb, Ḵhatītā aur Sobī ke ḵhāndānoñ
ke 138 ādmī.

⁴⁶ Rab ke ghar ke ḵhidmatgāroñ ke darj-e-zail
ḵhāndān jilāwatanī se wāpas āe.

Zihā, Hasūfā, Tabbāot, ⁴⁷ Qarūs, Siyā, Fadūn,
⁴⁸ Libānā, Hajābā, Shalmī, ⁴⁹ Hanān, Jiddel, Ja-
har, ⁵⁰ Riyāyāh, Razīn, Naqūdā, ⁵¹ Jazzām, Uzzā,
Fāsih, ⁵² Basī, Maūnīm, Nafūsīm, ⁵³ Baqbūq,
Haqūfā, Harhūr, ⁵⁴ Bazlūt, Mahīdā, Harshā,
⁵⁵ Barqūs, Sīsarā, Tāmāh, ⁵⁶ Naziyāh aur
Ḵhatifā.

⁵⁷ Sulemān ke ḵhādimoñ ke darj-e-zail
ḵhāndān jilāwatanī se wāpas āe.

Sūtī, Sūfirat, Farūdā, ⁵⁸ Yālā, Darqūn, Jiddel,
⁵⁹ Safatiyāh, Ḵhattīl, Fūkirat-zabāym aur Amūn.

⁶⁰ Rab ke ghar ke ḵhidmatgāroñ aur Sulemān
ke ḵhādimoñ ke ḵhāndānoñ meñ se wāpas āe
hue mardoñ kī tādād 392 thī.

⁶¹⁻⁶² Wāpas āe hue ḵhāndānoñ meñ se
Dilāyāh, Tūbiyāh aur Naqūdā ke 642 mard sābit
na kar sake kī Isrāīl kī aulād haiñ, go wuh Tal-
milah, Tal-harshā, Karūb, Addūn aur Immer ke
rahne wāle the.

63-64 Habāyāh, Haqqūz aur Barzillī ke ḳhāndānoñ ke kuchh imām bhī wāpas āe, lekin unheñ Rab ke ghar meñ ḳhidmat karne kī ijāzat na milī. Kyoñki go unhoñ ne nasabnāme meñ apne nām talāsh kie lekin un kā kahīñ zikr na milā, is lie unheñ nāpāk qarār diyā gayā. (Barzillī ke ḳhāndān ke bānī ne Barzillī Jiliyādī kī beṭī se shādī karke apne susar kā nām apnā liyā thā.)⁶⁵ Yahūdāh ke gawarnar ne hukm diyā ki in tīn ḳhāndānoñ ke imām filhāl qurbāniyoñ kā wuh hissā khāne meñ sharīk na hoñ jo imāmoñ ke lie muqarrar hai. Jab dubārā imām-e-āzam muqarrar kiyā jāe to wuhī Ūrīm aur Tummīm nāmī qurā ḍāl kar muāmalā hal kare.

⁶⁶ Kul 42,360 Isrāīlī apne watan lauṭ āe,⁶⁷ nīz un ke 7,337 ḡhulām aur launḍiyāñ aur 245 gulūkār jin meñ mard-o-ḳhawātīn shāmil the.

⁶⁸ Isrāīliyoñ ke pās 736 ghoṛe, 245 ḳhachchar,⁶⁹ 435 ūñṭ aur 6,720 gadhe the.

⁷⁰ Kuchh ḳhāndānī sarparastoñ ne Rab ke ghar kī tāmīr-e-nau ke lie apnī ḳhushī se hadiye die. Gawarnar ne sone ke 1,000 sikke, 50 kaṭore aur imāmoñ ke 530 libās die.⁷¹ Kuchh ḳhāndānī sarparastoñ ne ḳhazāne meñ sone ke 20,000 sikke aur chāñḍī ke 1,200 kilogrām ḍāl die.⁷² Bāqī logoñ ne sone ke 20,000 sikke, chāñḍī ke 1,100 kilogrām aur imāmoñ ke 67 libās atā kie.

⁷³ Imām, Lāwī, Rab ke ghar ke darbān aur ḳhidmatgār, gulūkār aur awām ke kuchh log apnī apnī ābāī ābādiyoñ meñ dubārā jā base. Yoñ tamām Isrāīlī dubārā apne apne shahroñ meñ rahne lage.”

Azrā Sharīat kī Tilāwat Kartā Hai

Sātweñ mahīne yānī Aktūbar meñ jab Isrāīlī apne apne shahron meñ dubārā ābād ho gae the

8

¹ to sab log mil kar Pānī ke Darwāze ke chauk meñ jamā ho gae. Unhoñ ne sharīat ke ālim Azrā se darḳhāst kī ki wuh sharīat le aeñ jo Rab ne Mūsā kī mārifat Isrāīlī qaum ko de dī thī. ² Chunāñche Azrā ne hāzirīn ke sāmne sharīat kī tilāwat kī. Sātweñ mahīne kā pahlā din * thā. Na sirf mard balki aurateñ aur sharīat kī bāteñ samajhne ke qābil tamām bachche bhī jamā hue the. ³ Subah-sawere se le kar dopahar tak Azrā Pānī ke Darwāze ke chauk meñ parhtā rahā, aur tamām jamāt dhyān se sharīat kī bāteñ suntī rahī.

⁴ Azrā lakaṛī ke ek chabūtare par khaṛā thā jo ḳhāskar is mauḳe ke lie banāyā gayā thā. Us ke dāeñ hāth Mattitīyāh, Samā, Anāyāh, Ūriyāh, Ḳhilqiyāh aur Māsiyāh khaṛe the. Us ke bāeñ hāth Fidāyāh, Mīsāel, Malkiyāh, Hāshūm, Hasbaddānā, Zakariyāh aur Masullām khaṛe the.

⁵ Chūñki Azrā ūñchī jagah par khaṛā thā is lie wuh sab ko nazar āyā. Chunāñche jab us ne kitāb ko khol diyā to sab log khaṛe ho gae. ⁶ Azrā ne Rab azīm Ḳhudā kī satāish kī, aur sab ne apne hāth uṭhā kar jawāb meñ kahā, “Āmīn, āmīn.” Phir unhoñ ne jhuk kar Rab ko sijdā kiyā.

⁷ Kuchh Lāwī hāzir the jinhoñ ne logoñ ke lie sharīat kī tashrīh kī. Un ke nām Yashua, Bānī,

* **8:2** 8 Aktūbar.

Saribiyāh, Yamīn, Aqqūb, Sabbatī, Hūdiyāh, Māsiyāh, Qalitā, Azariyāh, Yūzabad, Hanān aur Filāyāh the. Hāzirīn ab tak khaṛe the. ⁸ Sharīat kī tilāwat ke sāth sāth mazkūrā Lāwī qadam baqadam us kī tashrīh yon karte gae ki log use achchhī tarah samajh sake.

⁹ Sharīat kī bāteñ sun sun kar wuh rone lage. Lekin Nahmiyāh Gawarnar, sharīat ke ālim Azrā Imām aur sharīat kī tashrīh karne wāle Lāwīyon ne unheñ tasallī de kar kahā, “Udās na hoñ aur mat roeñ! Āj Rab āp ke Ḳhudā ke lie maḳhsūs-o-muḳaddas īd hai. ¹⁰ Ab jāeñ, umdā khānā khā kar aur pīne kī mīṭhī chīzeñ pī kar ḳhushī manāeñ. Jo apne lie kuchh taiyār na kar sakeñ unheñ apnī ḳhushī meñ sharīk kareñ. Yih dīn hamāre Rab ke lie maḳhsūs-o-muḳaddas hai. Udās na hoñ, kyonki Rab kī ḳhushī āp kī panāhgāh hai.”

¹¹ Lāwīyon ne bhī tamām logon ko sukūn dilā kar kahā, “Udās na hoñ, kyonki yih dīn Rab ke lie maḳhsūs-o-muḳaddas hai.”

¹² Phir sab apne apne ghar chale gae. Wahāñ unhoñ ne baṛī ḳhushī se khā-pī kar jashn manāyā. Sāth sāth unhoñ ne dūsron ko bhī apnī ḳhushī meñ sharīk kiyā. Un kī baṛī ḳhushī kā sabab yih thā ki ab unheñ un bāton kī samajh āī thī jo unheñ sunāī gāī thīñ.

Jhoñpriyon kī Īd

¹³ Agle dīn † ḳhāndānī sarparast, imām aur Lāwī dubārā sharīat ke ālim Azrā ke pās jamā hue tāki sharīat kī mazīd tālīm pāeñ. ¹⁴ Jab

† 8:13 9 Aktūbar.

wuh sharīat kā mutāla'ā kar rahe the to unheñ patā chalā ki Rab ne Mūsā kī mārifat hukm diyā thā ki Isrāīlī sātweñ mahīne kī īd ke daurān jhoñpṛiyōñ meñ raheñ. ¹⁵ Chunāñche unhoñ ne Yarūshalam aur bāqī tamām shahroñ meñ elān kiyā, “Pahāroñ par se zaitūn, ās, † khajūr aur bāqī sāyādār daraḳhtoñ kī shāḳheñ toṛ kar apne ghar le jāeñ. Wahāñ un se jhoñpṛiyāñ banāeñ, jis tarah sharīat ne hidāyat dī hai.”

¹⁶ Logoñ ne aisā hī kiyā. Wuh gharoñ se nikle aur daraḳhtoñ kī shāḳheñ toṛ kar le āe. Un se unhoñ ne apne ghāroñ kī chhatoñ par aur sahnoñ meñ jhoñpṛiyāñ banā līñ. Bāz ne apnī jhoñpṛiyōñ ko Rab ke ghar ke sahnoñ, Pānī ke Darwāze ke chauk aur Ifrāīm ke Darwāze ke chauk meñ bhī banāyā. ¹⁷ Jitne bhī jilāwatanī se wāpas āe the wuh sab jhoñpṛiyāñ banā kar un meñ rahne lage. Yashua bin Nūn ke zamāne se le kar us waqt tak yih īd is tarah nahīñ manāī gaī thī. Sab nihāyat hī ḳhush the. ¹⁸ Īd ke har dīn Azrā ne Allāh kī sharīat kī tilāwat kī. Sāt dīn Isrāīliyoñ ne īd manāī, aur āṭhweñ dīn sab log ijtimā ke lie ikatṭhe hue, bilkul un hidāyat ke mutābiq jo sharīat meñ dī gaī haiñ.

9

Isrāīlī Apne Gunāhoñ kā Iqrār Karte Haiñ

¹ Usī mahīne ke 24weñ dīn * Isrāīlī rozā rakhne ke lie jamā hue. Ṭāṭ ke libās pahne hue aur sar par ḳhāk ḍāl kar wuh Yarūshalam āe. ² Ab wuh tamām Ġhairyahūdiyoñ se alag ho kar un

† 8:15 myrtle * 9:1 31 Aktūbar.

gunāhoñ kā iqrār karne ke lie hāzir hue jo un se aur un ke bāpdādā se sarzad hue the. ³ Tīn ghañṭe wuh khare rahe, aur us daurān Rab un ke Ḳhudā kī shariyat kī tilāwat kī gaī. Phir wuh Rab apne Ḳhudā ke sāmne muñh ke bal jhuk kar mazīd tīn ghañṭe apne gunāhoñ kā iqrār karte rahe.

⁴ Yashua, Bānī, Qadmiyel, Sabaniyāh, Bunnī, Saribiyāh, Bānī aur Kanānī jo Lāwī the ek chabūtare par khare hue aur buland āwāz se Rab apne Ḳhudā se duā kī.

⁵ Phir Yashua, Qadmiyel, Bānī, Hasabniyāh, Saribiyāh, Hūdiyāh, Sabaniyāh aur Fatahiyāh jo Lāwī the bol uṭhe, “Khare ho kar Rab apne Ḳhudā kī jo azal se abad tak hai satāish karen!”

Unhoñ ne duā kī,

“Tere jalālī nām kī tamjīd ho, jo har mubārakbādī aur tārif se kahīn baṛh kar hai.

⁶ Ai Rab, tū hī wāhid Ḳhudā hai! Tū ne āsmān ko ek sire se dūsre sire tak us ke lashkar samet ḳhalaq kiyā. Zamīn aur jo kuchh us par hai, samundar aur jo kuchh us meñ hai sab kuchh tū hī ne banāyā hai. Tū ne sab ko zindagī baḳhshī hai, aur āsmānī lashkar tujhe sijdā kartā hai.

⁷ Tū hī Rab aur wuh Ḳhudā hai jis ne Abrām ko chun liyā aur Kasdiyōn ke shahr Ūr se bāhar lā kar Ibrāhīm kā nām rakhā. ⁸ Tū ne us kā dil wafādār pāyā aur us se ahd bāndh kar wādā kiyā, ‘Maiñ terī aulād ko Kanāniyōn, Hittiyōn, Amoriyōn, Farizziyōn, Yabūsiyōn aur Jirjāsiyōn kā mulk atā karūnga.’ Aur tū apne wāde par pūrā utrā, kyōnki tū qābil-e-etamād aur ādil hai.

⁹ Tū ne hamāre bāpdādā ke Misr meñ bure hāl par dhyān diyā, aur Bahr-e-Qulzum ke kināre par madad ke lie un kī chikheñ sunīñ. ¹⁰ Tū ne ilāhī nishānoñ aur mojizoñ se Firaun, us ke afsaroñ aur us ke mulk kī qaum ko sazā dī, kyonki tū jāntā thā ki Misrī hamāre bāpdādā se kaisā gustākhānā sulūk karte rahe haiñ. Yoñ terā nām mashhūr huā aur āj tak yād rahā hai. ¹¹ Qaum ke dekhte dekhte tū ne samundar ko do hissoñ meñ taqsīm kar diyā, aur wuh khushk zamīn par chal kar us meñ se guzar sake. Lekin un kā tāqqub karne wāloñ ko tū ne mutalātim pānī meñ phaiñk diyā, aur wuh pattharoñ kī tarah samundar kī gahrāiyōñ meñ ḍub gae.

¹² Dīn ke waqt tū ne bādāl ke satūn se aur rāt ke waqt āg ke satūn se apnī qaum kī rāhnumāi kī. Yoñ wuh rāstā andhere meñ bhī raushan rahā jis par unheñ chalnā thā. ¹³ Tū Koh-e-Sīnā par utar āyā aur āsmān se un se hamkalām huā. Tū ne unheñ sāf hidāyāt aur qābil-e-etamād ahkām die, aise qawāyd jo achche haiñ. ¹⁴ Tū ne unheñ Sabat ke dīn ke bāre meñ āgāh kiyā, us dīn ke bāre meñ jo tere lie maḥsūs-o-muqaddas hai. Apne khādīm Mūsā kī mārifat tū ne unheñ ahkām aur hidāyāt dīñ. ¹⁵ Jab wuh bhūke the to tū ne unheñ āsmān se roṭī khilāi, aur jab pyāse the to tū ne unheñ chaṭān se pānī pilāyā. Tū ne hukm diyā, 'Jāo, mulk meñ dākhl ho kar us par qabzā kar lo, kyonki maiñ ne hāth uṭhā kar qasam khāi hai ki tumheñ yih mulk dūngā.'

16 Afsos, hamāre bāpdādā maḡhrūr aur ziddī ho gae. Wuh tere ahkām ke tābe na rahe. 17 Unhoñ ne terī sunane se inkār kiyā aur wuh moġizāt yād na rakhe jo tū ne un ke darmiyān kie the. Wuh yahāñ tak aṛ gae ki unhoñ ne ek rāhnumā ko muḡarrar kiyā jo unheñ Misr kī ḡhulāmī meñ wāpas le jāe. Lekin tū muāf karne wālā Ḳhudā hai jo mehrbān aur rahīm, tahammul aur shafqat se bharpūr hai. Tū ne unheñ tark na kiyā, 18 us waqt bhī nahīñ jab unhoñ ne apne lie sone kā bachhrā ḡhāl kar kahā, ‘Yih terā Ḳhudā hai jo tujhe Misr se nikāl lāyā.’ Is ḡism kā sanġidā kufr wuh bakte rahe. 19 Lekin tū bahut rahm dil hai, is lie tū ne unheñ registān meñ na chhoṛā. Dīn ke waqt bādāl kā satūn un kī rāhnumāi kartā rahā, aur rāt ke waqt āḡ kā satūn wuh rāstā raushan kartā rahā jis par unheñ chalnā thā. 20 Na sirf yih balki tū ne unheñ apnā nek Rūh atā kiyā jo unheñ tālīm de. Jab unheñ bhūk aur pyās thī to tū unheñ man khilāne aur pāñī pilāne se bāz na āyā. 21 Chālīs sāl wuh registān meñ phirte rahe, aur us pūre arse meñ tū un kī zarūriyāt ko pūrā kartā rahā. Unheñ koī bhī kamī nahīñ thī. Na un ke kapṛe ḡhis kar phaṭe aur na un ke pāñw sūje.

22 Tū ne mamālik aur ḡaumeñ un ke hawāle kar dīñ, muḡhtalif ilāḡe yake bād dīḡare un ke ḡabze meñ āe. Yoñ wuh Sīhon Bādshāh ke mulk Hasbon aur Oj Bādshāh ke mulk Basan par fatah pā sake. 23 Un kī aulād terī marzī se āsmān par ke sitāroñ jaisī beshumār huī, aur tū unheñ us mulk meñ lāyā jis kā wādā tū ne un ke bāpdādā

se kiyā thā. ²⁴ Wuh mulk meñ dākḥil ho kar us ke mālik ban gae. Tū ne Kanān ke bāshindon ko un ke āge āge zer kar diyā. Mulk ke bādshāh aur qaumeñ un ke qabze meñ ā gañ, aur wuh apnī marzī ke mutābiq un se nipaṭ sake. ²⁵ Qilāband shahr aur zarḥhez zamīneñ terī qaum ke qābū meñ ā gañ, nīz har qism kī achchhī chīzon se bhare ghar, taiyārshudā hauz, angūr ke bāgh aur kasrat ke zaitūn aur dīgar phaldār darakht. Wuh jī bhar kar khānā khā kar moṭe ho gae aur terī barkaton se lutfandoz hote rahe.

²⁶ Is ke bāwujūd wuh tābe na rahe balki sarkash hue. Unhoñ ne apnā muñh terī sharīat se pher liyā. Aur jab tere nabī unheñ samjhā samjhā kar tere pās wāpas lānā chāhte the to unhoñ ne baṛe kufr bak kar unheñ qatl kar diyā. ²⁷ Yih dekh kar tū ne unheñ un ke dushmanon ke hawāle kar diyā jo unheñ tang karte rahe. Jab wuh musībat meñ phañs gae to wuh chīkheñ mār mār kar tujh se fariyād karne lage. Aur tū ne āsmān par se un kī sunī. Baṛā tars khā kar tū ne un ke pās aise logoñ ko bhej diyā jinhoñ ne unheñ dushmanon ke hāth se chhuṛāyā. ²⁸ Lekin jyon hī Isrāīliyon ko sukūn miltā wuh dubārā aisī harkateñ karne lagte jo tujhe nāpasand thīn. Natīje meñ tū unheñ dubārā un ke dushmanon ke hāth meñ chhoṛ detā. Jab wuh un kī hukūmat ke taht pisne lagte to wuh ek bār phir chillā chillā kar tujh se iltamās karne lagte. Is bār bhī tū āsmān par se un kī suntā. Hāñ, tū itnā rahm dil hai kī tū unheñ bār bār chhuṭkārā detā rahā! ²⁹ Tū unheñ samjhātā rahā tāki wuh dubārā terī

shariyat kī taraf rujū karen, lekin wuh maḡhrūr the aur tere ahkām ke tābe na hue. Unhoñ ne terī hidāyāt kī ḡhilāfwarzī kī, hālāñki inhīñ par chalne se insān ko zindagī hāsīl hotī hai. Lekin unhoñ ne parwā na kī balki apnā muñh tujh se pher kar aḡ gae aur sunane ke lie taiyār na hue.

³⁰ Un kī harkatoñ ke bāwujūd tū bahut sāloñ tak sabar kartā rahā. Terā Rūh unheñ nabiyōñ ke zariye samjhātā rahā, lekin unhoñ ne dhyān na diyā. Tab tū ne unheñ ḡhairqaumoñ ke hawāle kar diyā. ³¹ Tāham terā rahm se bharā dil unheñ tark karke tabāh nahīñ karnā chāhtā thā. Tū kitnā mehrbān aur rahīm Ḳhudā hai!

³² Ai hamāre Ḳhudā, ai azīm, qawī aur mahīb Ḳhudā jo apnā ahd aur apnī shafqat qāym rakhtā hai, is waqt hamārī musībat par dhyān de aur use kam na samajh! Kyoñki hamāre bādshāh, buzurg, imām aur nabī balki hamāre bāpdādā aur pūrī qaum Asūrī bādshāhoñ ke pahle hamloñ se le kar āj tak saḡht musībat bardāsht karte rahe haiñ. ³³ Haqīqat to yih hai ki jo bhī musībat ham par āī hai us meñ tū rāst sābit huā hai. Tū wafādār rahā hai, go ham qusūrwar ṡhahre haiñ. ³⁴ Hamāre bādshāh aur buzurg, hamāre imām aur bāpdādā, un sab ne terī shariyat kī pairawī na kī. Jo ahkām aur tambīh tū ne unheñ dī us par unhoñ ne dhyān hī na diyā. ³⁵ Tū ne unheñ un kī apnī bādshāhī, kasrat kī achchhī chīzoñ aur ek wasī aur zarkhez mulk se nawāzā thā. To bhī wuh terī ḡhidmat karne ke lie taiyār na the aur apnī ḡhalat rāhoñ

se bāz na āe.

³⁶ Is kā anjām yih huā hai ki āj ham us mulk meñ ġhulām haiñ jo tū ne hamāre bāpdādā ko atā kiyā thā tāki wuh us kī paidāwār aur daulat se lutfandoz ho jāeñ. ³⁷ Mulk kī wāfir paidāwār un bādshāhoñ tak pahuñchtī hai jinheñ tū ne hamāre gunāhoñ kī wajah se ham par muqarrar kiyā hai. Ab wuhī ham par aur hamāre maweshiyon par hukūmat karte haiñ. Unhīñ kī marzī chaltī hai. Chunāñche ham baṛī musibat meñ phañse haiñ.

Qaum kā Ahdnāmā

³⁸ Yih tamām bāteñ madd-e-nazar rakh kar ham ahd bāndh kar use qalamband kar rahe haiñ. Hamāre buzurg, Lāwī aur imām dastkhat karke ahdnāme par muhr lagā rahe haiñ.”

10

¹ Zail ke logoñ ne dastkhat kie.

Gawarnar Nahmiyāh bin Hakaliyāh, Sidqiyāh, ² Sirāyāh, Azariyāh, Yarmiyāh, ³ Fashhūr, Amariyāh, Malkiyāh, ⁴ Hattūsh, Sabaniyāh, Mallūk, ⁵ Hārim, Marīmot, Abadiyāh, ⁶ Dānyāl, Jinnatūn, Bārūk, ⁷ Masullām, Abiyāh, Miyāmīn, ⁸ Māziyāh, Biljī aur Samāyāh. Sirāyāh se le kar Samāyāh tak imām the.

⁹ Phir zail ke Lāwiyon ne dastkhat kie.

Yashua bin Azaniyāh, Hanadād ke khandān kā Binnūī, Qadmiyel, ¹⁰ un ke bhāī Sabaniyāh, Hūdiyāh, Qalītā, Filāyāh, Hanān, ¹¹ Mīkā, Rahob, Hasbiyāh, ¹² Zakkūr, Saribiyāh, Sabaniyāh, ¹³ Hūdiyāh, Bānī aur Banīnū.

14 In ke bād zail ke qaumī buzurgoñ ne dastkhat kie.

Parūs, Pakhat-moāb, Ailām, Zattū, Bānī
 15 Bunnī, Azjād, Babī, 16 Adūniyāh, Bigwī,
 Adīn, 17 Atīr, Hizqiyāh, Azzūr, 18 Hūdiyāh,
 Hāshūm, Bazī, 19 Khārif, Anatot, Nebī,
 20 Magfiyās, Masullām, Hizīr 21 Mashezabel,
 Sadoq, Yaddū, 22 Falatīyāh, Hanān, Anāyāh,
 23 Hosea, Hananiyāh, Hassūb, 24 Hallūhesh,
 Filhā, Sobeq, 25 Rahūm, Hasabnāh, Māsiyāh,
 26 Akhiyāh, Hanān, Anān, 27 Mallūk, Hārim aur
 Bānā.

28 Qaum ke bāqī log bhī ahd meñ sharīk hue yānī bāqī imām, Lāwī, Rab ke ghar ke darbān aur khidmatgār, gulūkār, nīz sab jo Ghairyahūdī qaumoñ se alag ho gae the tāki Rab kī shariyat kī pairawī karen. Un kī bīwiyañ aur wuh beṭe-beṭiyañ bhī sharīk hue jo ahd ko samajh sakte the. 29 Apne buzurg bhāiyōñ ke sāth mil kar unhoñ ne qasam khā kar wādā kiyā, “Ham us shariyat kī pairawī karenge jo Allāh ne hameñ apne khādīm Mūsā kī mārifat dī hai. Ham ehtiyāt se Rab apne āqā ke tamām ahkām aur hidāyāt par amal karenge.”

30 Nīz, unhoñ ne qasam khā kar wādā kiyā,
 “Ham apne beṭe-beṭiyōñ kī shādī
 Ghairyahūdīyōñ se nahīn karāenge.

31 Jab Ghairyahūdī hameñ Sabat ke din yā Rab ke lie maḥsūs kisī aur din anāj yā koī aur māl bechne kī koshish karen to ham kuchh nahīn kharīdenge.

Har sātweñ sāl ham zamīn kī khetībārī nahīn karenge aur tamām karze mansūkh karenge.

³² Ham sālānā Rab ke ghar kī k̄hidmat ke lie chāndī kā chhoṭā sikkā * deṅge. Is k̄hidmat meñ zail kī chīzeñ shāmīl haiñ: ³³ Allāh ke lie maḥsūs roṭī, ḡhallā kī nazar aur bhasm hone wālī wuh qurbāniyāñ jo rozānā pesh kī jāṭī haiñ, Sabat ke dīn, Nae Chānd kī Īd aur bāqī īdoñ par pesh kī jāne wālī qurbāniyāñ, k̄hās muḡaddas qurbāniyāñ, Isrāīl kā kaffarā dene wālī gunāh kī qurbāniyāñ, aur hamāre K̄hudā ke ghar kā har kām.

³⁴ Ham ne qurā ḍāl kar muḡarrar kiyā hai ki imāmoñ, Lāwīyoñ aur bāqī qaum ke kaun kaun-se k̄hāndān sāl meñ kin kin muḡarrarā mauḡoñ par Rab ke ghar meñ lakaṛī pahuñchāeñ. Yih lakaṛī hamāre K̄hudā kī qurbāngāh par qurbāniyāñ jalāne ke lie istemāl kī jāegī, jis tarah sharīat meñ likhā hai.

³⁵ Ham sālānā apne khetoñ aur darak̄htoñ kā pahlā phal Rab ke ghar meñ pahuñchāeṅge.

³⁶ Jis tarah sharīat meñ darj hai, ham apne pahlauṭhoñ ko Rab ke ghar meñ lā kar Allāh ke lie maḥsūs kareṅge. Gāy-bailoñ aur bheṛ-bakriyoñ ke pahle bachche ham k̄hidmatguzār imāmoñ ko qurbān karne ke lie deṅge. ³⁷ Unheñ ham sāl ke pahle ḡhallā se gūndhā huā āṭā, apne darak̄htoñ kā pahlā phal, apnī naī mai aur zaitūn ke nae tel kā pahlā hissā de kar Rab ke ghar ke godāmoñ meñ pahuñchāeṅge.

Dehāt meñ ham Lāwīyoñ ko apnī fasloñ kā daswāñ hissā deṅge, kyoñki wuhī dehāt meñ yih hissā jamā karte haiñ. ³⁸ Daswāñ hissā milte waqt koī imām yānī Hārūn ke k̄hāndān

* **10:32** Chāndī ke taqṛīban 4 grām.

kā koī mard Lāwiyōñ ke sāth hogā, aur Lāwī māl kā daswāñ hissā hamāre Ḳhudā ke ghar ke godāmoñ meñ pahuñchāenge. ³⁹ Ām log aur Lāwī wahāñ ḡhallā, naī mai aur zaitūn kā tel lāenge. In kamroñ meñ maqdis kī ḡhidmat ke lie darkār tamām sāmān mahfūz rakhā jāegā. Is ke alāwā wahāñ imāmoñ, darbānoñ aur gulūkāroñ ke kamre hoñge.

Ham apne Ḳhudā ke ghar meñ tamām farāyz saranjām dene meñ ḡhaflat nahīñ barteñge.”

11

Yarūshalam aur Yahūdāh ke Bāshinde

¹ Qaum ke buzurg Yarūshalam meñ ābād hue the. Faislā kiyā gayā ki bāqī logoñ ke har dasweñ ḡhāndān ko muḡaddas shahr Yarūshalam meñ basnā hai. Yih ḡhāndān qurā ḡāl kar muḡarrar kie gae. Bāqī ḡhāndānoñ ko un kī maḡāmī jaghoñ meñ rahne kī ijāzat thī. ² Lekin jītne log apnī ḡhushī se Yarūshalam jā base unheñ dūsroñ ne mubārakbād dī.

³ Zail meñ sūbe ke un buzurgoñ kī fahrist hai jo Yarūshalam meñ ābād hue. (Aksar log Yahūdāh ke bāqī shahroñ aur dehāt meñ apnī maurūsī zamīn par baste the. In meñ ām Isrāīlī, imām, Lāwī, Rab ke ghar ke ḡhidmatgār aur Sulemān ke ḡhādimoñ kī aulād shāmil the. ⁴ Lekin Yahūdāh aur Binyamīn ke chand ek log Yarūshalam meñ jā base.)

Yahūdāh kā qabīlā:

Fāras ke ḡhāndān kā Atāyāh bin Uzziyāh bin Zakariyāh bin Amariyāh bin Safatiyāh bin Mahalalel,

⁵ Silonī ke ḵhāndān kā Māsiyāh bin Bārūk bin Kulhozā bin Hazāyāh bin Adāyāh bin Yūyārīb bin Zakariyāh.

⁶ Fāras ke ḵhāndān ke 468 asar-o-rasūḵh rakhne wāle ādmī apne ḵhāndānoñ samet Yarūshalam meñ rihāishpazīr the.

⁷ Binyamīn kā qabīlā:

Sallū bin Masullām bin Yoed bin Fidāyāh bin Qaulāyāh bin Māsiyāh bin Ītiyel bin Yasāyāh.

⁸ Sallū ke sāth Jabbī aur Sallī the. Kul 928 ādmī the. ⁹ In par Yoel bin Zikrī muqarrar thā jabki Yahūdāh bin Sanūsāh shahr kī intazāmiyā meñ dūsre nambar par ātā thā.

¹⁰ Yarūshalam meñ zail ke imām rahte the.

Yadāyāh, Yūyārīb, Yakīn ¹¹ aur Sirāyāh bin Ḵhilqiyāh bin Masullām bin Sadoq bin Mirāyot bin Aḵhītūb. Sirāyāh Allāh ke ghar kā muntazim thā.

¹² In imāmoñ ke 822 bhāi Rab ke ghar meñ ḵhidmat karte the.

Nīz, Adāyāh bin Yarohām bin Filaliyāh bin Amsī bin Zakariyāh bin Fashhūr bin Malkiyāh.

¹³ Us ke sāth 242 bhāi the jo apne apne ḵhāndānoñ ke sarparast the.

In ke alāwā Amashsī bin Azarel bin Aḵhzī bin Masillamot bin Immer. ¹⁴ Us ke sāth 128 asar-o-rasūḵh rakhne wāle bhāi the. Zabdiyel bin Hajjadūlīm un kā inchārj thā.

¹⁵ Zail ke Lāwī Yarūshalam meñ rihāishpazīr the. Samāyāh bin Hassūb bin Azrīqām bin Hasbiyāh bin Bunnī,

¹⁶ nīz Sabbatī aur Yūzabad jo Allāh ke ghar se bāhar ke kām par muqarrar the,

17 nīz shukrguzārī kā rāhnumā Mattaniyāh bin Mikā bin Zabdī bin Āsaf thā jo duā karte waqt hamd-o-sanā kī rāhnumāī kartā thā,
nīz us kā madadgār Mattaniyāh kā bhāi Baqbūqiyāh,

aur ākhir meñ Abdā bin Sammua bin Jalāl bin Yadūtūn.

18 Lāwiyōñ ke kul 284 mard muqaddas shahr meñ rahte the.

19 Rab ke ghar ke darbānoñ ke darj-e-zail mard Yarūshalam meñ rahte the.

Aqqūb aur Talmūn apne bhāiyōñ samet darwāzoñ ke pahredār the. Kul 172 mard the.

20 Qaum ke bāqī log, imām aur Lāwī Yarūshalam se bāhar Yahūdāh ke dūsre shahroñ meñ ābād the. Har ek apnī ābāi zamīn par rahtā thā.

21 Rab ke ghar ke k̄hidmatgār Ofal Pahārī par baste the. Zīhā aur Jīsfā un par muqarrar the.

22 Yarūshalam meñ rahne wāle Lāwiyōñ kā nīgarān Uzzī bin Bānī bin Hasbiyāh bin Mattaniyāh bin Mikā thā. Wuh Āsaf ke k̄hāndān kā thā, us k̄hāndān kā jis ke gulūkār Allāh ke ghar meñ k̄hidmat karte the. 23 Bādshāh ne muqarrar kiyā thā ki Āsaf ke k̄hāndān ke kin kin ādmiyōñ ko kis kis dīn Rab ke ghar meñ gīt gāne kī k̄hidmat karnī hai.

24 Fatahiyāh bin Mashezabel Isrāīlī muāmaloñ meñ Fāras ke bādshāh kī numāindaḡī kartā thā. Wuh Zārah bin Yahūdāh ke k̄hāndān kā thā.

25 Yahūdāh ke qabīle ke afrād zail ke shahroñ meñ ābād the.

Qiriyat-arbā, Dībon aur Qabziyel gird-o-nawāh kī ābādiyoñ samet, ²⁶ Yashua, Molādā, Bait-falat, ²⁷ Hasār-suāl, Bair-sabā gird-o-nawāh kī ābādiyoñ samet, ²⁸ Siqlāj, Makūnāh gird-o-nawāh kī ābādiyoñ samet, ²⁹ Ain-rimmon, Sur'ā, Yarmūt, ³⁰ Zanūh, Adullām gird-o-nawāh kī haweliyoñ samet, Lakīs gird-o-nawāh ke khetoñ samet aur Azīqā gird-o-nawāh kī ābādiyoñ samet. Ġharz, wuh junūb meñ Bair-sabā se le kar shimāl meñ Wādī-e-Hinnūm tak ābād the.

³¹ Binyamīn ke qabīle kī rihāish zail ke maqāmoñ meñ thī.

Jibā, Mikmās, Aiyāh, Baitel gird-o-nawāh kī ābādiyoñ samet, ³² Anatot, Nob, Ananiyāh, ³³ Hasūr, Rāmā, Jittaim, ³⁴ Hādīd, Zaboīm, Na-ballāt, ³⁵ Lūd, Onūs aur Kārīgaroñ kī Wādī.

³⁶ Lāwī qabīle ke kuchh ḳhāndān jo pahle Yahūdāh meñ rahte the ab Binyamīn ke qabāyli ilāqe meñ ābād hue.

12

Imāmoñ aur Lāwiyoñ kī Fahrīst

¹ Darj-e-zail un imāmoñ aur Lāwiyoñ kī fahrīst hai jo Zarubbābal bin Siyāltiyel aur Yashua ke sāth jilāwatanī se wāpas āe.

Imām:

Sirāyāh, Yarmiyāh, Azrā,

² Amariyāh, Mallūk, Hattūsh, ³ Sakaniyāh, Rahūm, Marīmot, ⁴ Iddū, Jinnatūn, Abiyāh, ⁵ Miyāmīn, Muadiyāh, Biljā, ⁶ Samāyāh, Yūyārīb, Yadāyāh, ⁷ Sallū, Amūq, Ḳhilqiyāh, aur Yadāyāh.

Yih Yashua ke zamāne meñ imāmoñ aur un ke bhāiyōñ ke rāhnumā the.

⁸ Lāwī:

Yashua, Binnūī, Qadmiyel, Saribiyāh, Yahūdāh aur Mattaniyāh. Mattaniyāh apne bhāiyōñ ke sāth Rab ke ghar meñ hamd-o-sanā ke gīt gāne meñ rāhnumāī kartā thā. ⁹ Baqbūqiyāh aur Unnī apne bhāiyōñ ke sāth ibādat ke daurān un ke muqābil khaṛe hote the.

¹⁰ Imām-e-āzam Yashua kī aulād:

Yashua Yūyaqīm kā bāp thā, Yūyaqīm Iliyāsib kā, Iliyāsib Yoyadā kā, ¹¹ Yoyadā Yūnatan kā, Yūnatan Yaddū kā.

¹² Jab Yūyaqīm imām-e-āzam thā to zail ke imām apne kḥāndānoñ ke sarparast the.

Sirāyāh ke kḥāndān kā Mirāyāh,
Yarmiyāh ke kḥāndān kā Hananiyāh,

¹³ Azrā ke kḥāndān kā Masullām,
Amariyāh ke kḥāndān kā Yūhanān,

¹⁴ Mallūk ke kḥāndān kā Yūnatan,
Sabaniyāh ke kḥāndān kā Yūsuf,

¹⁵ Hārim ke kḥāndān kā Adnā,
Mirāyot ke kḥāndān kā Kḥilqī,

¹⁶ Iddū ke kḥāndān kā Zakariyāh,
Jinnatūn ke kḥāndān kā Masullām,

¹⁷ Abiyāh ke kḥāndān kā Zikrī,
Mīnyamīn ke kḥāndān kā ek ādmī,

Muadiyāh ke kḥāndān kā Filtī,
¹⁸ Biljā ke kḥāndān kā Sammua,

Samāyāh ke kḥāndān kā Yahūnatan,

¹⁹ Yūyārīb ke kḥāndān kā Mattanī,
Yadāyāh ke kḥāndān kā Uzzī,

²⁰ Sallī ke kḥāndān kā Qallī,

Amūq ke ḵhāndān kā Ibar,

²¹ Ḵhilqiyāh ke ḵhāndān kā Hasbiyāh,
Yadāyāh ke ḵhāndān kā Nataniyel.

²² Jab Iliyāsib, Yoyadā, Yūhanān aur Yaddū imām-e-āzam the to Lāwī ke sarparastoñ kī fahrist taiyār kī gaī aur isī tarāḥ Fāras ke bādshāh Dārā ke zamāne meñ imāmoñ ke ḵhāndānī sarparastoñ kī fahrist.

²³ Lāwī ke ḵhāndānī sarparastoñ ke nām imām-e-āzam Yūhanān bin Iliyāsib ke zamāne tak tarīḵh kī kitāb meñ darj kie gae.

²⁴⁻²⁵ Lāwī ke ḵhāndānī sarparast Hasbiyāh, Saribiyāh, Yashua, Binnūī aur Qadmiyel ḵhidmat ke un gurohoñ kī rāhnumāī karte the jo Rab ke ghar meñ hamd-o-sanā ke gīt gāte the. Un ke muqābil Mattaniyāh, Baqbūqiyāh aur Abadiyāh apne gurohoñ ke sāth ḵhaḗe hote the. Gīt gāte waqt kabhī yih guroh aur kabhī us ke muqābil kā guroh gātā thā. Sab kuchh us tartīb se huā jo mard-e-Ḵhudā Dāūd ne muqarrar kī thī.

Masullām, Talmūn aur Aqqūb darbān the jo Rab ke ghar ke darwāzoñ ke sāth wāqe godāmoñ kī pahrādārī karte the.

²⁶ Yih ādmī imām-e-āzam Yūyaqīm bin Yashua bin Yūsadaq, Nahmiyāh Gawarnar aur shariyat ke ālim Azrā Imām ke zamāne meñ apnī ḵhidmat saranjām dete the.

Fasīl kī Maḵsūsiyat

²⁷ Fasīl kī maḵsūsiyat ke lie pūre mulk ke Lāwiyoñ ko Yarūshalam bulāyā gayā tāki

wuh ḵhushī manāne meñ madad karke hamd-o-sanā ke gīt gāeñ aur jhāñjh, sitār aur sarod bajāeñ. ²⁸ Gulūkār Yarūshalam ke gird-o-nawāh se, Natūfātiyoñ ke dehāt, ²⁹ Bait-jiljāl aur Jibā aur Azmāwat ke ilāqe se āe. Kyoñki gulūkāroñ ne apnī apnī ābādiyāñ Yarūshalam ke irdgird banāi thīñ. ³⁰ Pahle imāmoñ aur Lāwiyōñ ne apne āp ko jashn ke lie pāk-sāf kiyā, phir unhoñ ne ām logoñ, darwāzoñ aur fasīl ko bhī pāk-sāf kar diyā.

³¹ Is ke bād maiñ ne Yahūdāh ke qabile ke buzurgoñ ko fasīl par chaḥññī diyā aur gulūkāroñ ko shukrguzārī ke do baḥe gurohoñ meñ taqsīm kiyā. Pahlā guroh fasīl par chalte chalte junūb meñ wāqe Kachre ke Darwāze kī taraf baḥ gayā. ³² In gulūkāroñ ke pīchhe Hūsāyāh Yahūdāh ke ādhe buzurgoñ ke sāth chalā ³³ jabki in ke pīchhe Azariyāh, Azrā, Masullām, ³⁴ Yahūdāh, Binyamīn, Samāyāh aur Yarmiyāh chale. ³⁵ Āḵhirī guroh imām the jo turam bajāte rahe. In ke pīchhe zail ke mausiḳār āe: Zakariyāh bin Yūnatan bin Samāyāh bin Mattaniyāh bin Mikāyāh bin Zakkūr bin Āsaf ³⁶ aur us ke bhāi Samāyāh, Azarel, Milalī, Jilalī, Māi, Nataniyel, Yahūdāh aur Hanānī. Yih ādmī mard-e-Ḵhudā Dāūd ke sāz bajāte rahe. Sharīat ke ālim Azrā ne julūs kī rāhnumāi kī. ³⁷ Chashme ke Darwāze ke pās ā kar wuh sīdhe us sīḥī par chaḥ gae jo Yarūshalam ke us hisse tak pahuñchātī hai jo ‘Dāūd kā Shahr’ kahlātā hai. Phir Dāūd ke mahal ke pīchhe se guzar kar wuh shahr ke maḡhrib meñ wāqe Pānī ke Darwāze

tak pahuñch gae.

³⁸ Shukrguzārī kā dūsrā guroh fasīl par chalte chalte shimāl meñ wāḡe Tanūroñ ke Burj aur ‘Moṭī Dīwār’ kī taraf baḡh gayā, aur maiñ bāqī logoñ ke sāth us ke pīchhe ho liyā. ³⁹ Ham Ifrāīm ke Darwāze, Yasānā ke Darwāze, Machhli ke Darwāze, Hananel ke Burj, Miyā Burj aur Bheḡ ke Darwāze se ho kar Muhāfizoñ ke Darwāze tak pahuñch gae jahāñ ham ruk gae.

⁴⁰ Phir shukrguzārī ke donoñ guroh Rab ke ghar ke pās khaḡe ho gae. Maiñ bhī buzurgoñ ke ādhe hisse ⁴¹ aur zail ke turam bajāne wāle imāmoñ ke sāth Rab ke ghar ke sahan meñ khaḡā huā: Iliyāqīm, Māsiyāh, Minyamīn, Mīkāyāh, Iliyuinī, Zakariyāh aur Hananiyāh. ⁴² Māsiyāh, Samāyāh, Iliyazar, Uzzī, Yūhanān, Malkiyāh, Ailām aur Azar bhī hamāre sāth the. Gulūkār Izraḡhiyāh kī rāhnumāi meñ hamd-o-sanā ke gīt gāte rahe.

⁴³ Us din zabah kī baḡī baḡī qurbāniyāñ pesh kī gaīñ, kyoñki Allāh ne ham sab ko bāl-bachchoñ samet baḡī ḡhushī dilāi thī. ḡhushiyōñ kā itnā shor mach gayā ki us kī āwāz dūr-darāz ilāqoñ tak pahuñch gaī.

Rab ke Ghar ke Godāmoñ kī Zimmedārī

⁴⁴ Us waḡt kuchh ādmiyōñ ko un godāmoñ ke nigarān banāyā gayā jin meñ hadiye, fasloñ kā pahlā phal aur paidāwār kā daswāñ hissā mahfūz rakhā jātā thā. Un meñ shahroñ kī fasloñ kā wuh hissā jamā karnā thā jo shariyat ne imāmoñ aur Lāwiyoñ ke lie muḡarrar kiyā thā. Kyoñki Yahūdāh ke bāshinde ḡhidmat karne wāle imāmoñ aur Lāwiyoñ se ḡhush the ⁴⁵ jo

apne ẖhudā kī ẖhidmat tahārat ke rasm-o-riwāj samet achchhī tarah anjām dete the. Rab ke ghar ke gulūkār aur darbān bhī Dāūd aur us ke beṭe Sulemān kī hidāyāt ke mutābiq hī ẖhidmat karte the. ⁴⁶ Kyoṅki Dāūd aur Āsaf ke zamāne se hī gulūkāroṅ ke liḍar Allāh kī hamd-o-sanā ke gītoṅ meṅ rāhnumāi karte the.

⁴⁷ Chunānche Zarubbābal aur Nahmiyāh ke dinon meṅ tamām Isrāīl Rab ke ghar ke gulūkāroṅ aur darbānoṅ kī rozānā zarūriyāt pūrī kartā thā. Lāwiyon ko wuh hissā diyā jātā jo un ke lie maḵsūs thā, aur Lāwī us meṅ se imāmoṅ ko wuh hissā diyā karte the jo un ke lie maḵsūs thā.

13

Moābiyon aur Ammoniyon se Alahdagī

¹ Us din qaum ke sāmne Mūsā kī sharīat kī tilāwat kī gai. Paṛhte paṛhte mālūm huā ki Ammoniyon aur Moābiyon ko kabhī bhī Allāh kī qaum meṅ sharīk hone kī ijāzat nahīn. ² Wajah yih hai ki in qaumoṅ ne Misr se nikalte waqt Isrāīliyon ko khānā khilāne aur pānī pilāne se inkār kiyā thā. Na sirf yih balki unhoṅ ne Bilām ko paise die the tāki wuh Isrāīlī qaum par lānat bheje, agarche hamāre ẖhudā ne lānat ko barkat meṅ tabdīl kiyā. ³ Jab hāzirīn ne yih hukm sunā to unhoṅ ne tamām Ġhairyahūdiyon ko jamāt se ẖhārij kar diyā.

Rab ke Ghar ke Intazām kī Islāh

⁴ Is wāqiye se pahle Rab ke ghar ke godāmoṅ par muqarrar imām Iliyāsib ne apne rishtedār

Tūbiyāh ⁵ ke lie ek baṛā kamrā khalī kar diyā thā jis meñ pahle ghallā kī nazareñ, baḡhūr aur kuchh ālāt rakhe jāte the. Niz, ghallā, naī mai aur zaitūn ke tel kā jo daswāñ hissā Lāwiyoñ, gulūkāroñ aur darbānoñ ke lie muqarrar thā wuh bhī us kamre meñ rakhā jātā thā aur sāth sāth imāmoñ ke lie muqarrar hissā bhī. ⁶ Us waqt main Yarūshalam meñ nahīn thā, kyōñki Bābal ke bādshāh Artakhsastā kī hukūmat ke 32weñ sāl meñ main us ke darbār meñ wāpas ā gayā thā. Kuchh der bād main shahanshāh se ijāzat le kar dubārā Yarūshalam ke lie rawānā huā. ⁷ Wahāñ pahuñch kar mujhe patā chalā ki Iliyāsib ne kitnī burī harkat kī hai, ki us ne apne rishtedār Tūbiyāh ke lie Rab ke ghar ke sahan meñ kamrā khalī kar diyā hai. ⁸ Yih bāt mujhe nihāyat hī burī lagī, aur main ne Tūbiyāh kā sārā sāmān kamre se nikāl kar phaiñk diyā. ⁹ Phir main ne hukm diyā ki kamre nae sire se pāk-sāf kar die jāeñ. Jab aisā huā to main ne Rab ke ghar kā sāmān, ghallā kī nazareñ aur baḡhūr dubārā wahāñ rakh diyā.

¹⁰ Mujhe yih bhī mālūm huā ki Lāwī aur gulūkār Rab ke ghar meñ apnī kḡhidmat ko chhoṛ kar apne khetoñ meñ kām kar rahe haiñ. Wajah yih thī ki unheñ wuh hissā nahīn mil rahā thā jo un kā haq thā. ¹¹ Tab main ne zimmedār afsaroñ ko jhīrak kar kahā, “Ap Allāh ke ghar kā intazām itnī beparwāī se kyōñ chalā rahe haiñ?” Main ne Lāwiyoñ aur gulūkāroñ ko wāpas bulā kar dubārā un kī zimmedāriyoñ par lagāyā. ¹² Yih dekh kar tamām Yahūdāh ghallā, naī mai aur zaitūn ke tel kā daswāñ hissā godāmoñ meñ

lāne lagā. ¹³ Godāmoñ kī nigārānī maiñ ne Salamiyāh Imām, Sadoq Munshī aur Fidāyāh Lāwī ke sapurd karke Hanān bin Zakkūr bin Mattaniyāh ko un kā madadgār muqarrar kiyā, kyonki chāroñ ko qābil-e-etamād samjhā jātā thā. Unhīñ ko imāmoñ aur Lāwiyon meñ un ke muqarrarā hisse taqsim karne kī zimmedārī dī gai.

¹⁴ Ai mere Khudā, is kām ke bāis mujhe yād kar! Wuh sab kuchh na bhūl jo maiñ ne wafādārī se apne Khudā ke ghar aur us ke intazām ke lie kiyā hai.

Sabat kī Bahālī

¹⁵ Us waqt maiñ ne Yahūdāh meñ kuchh logoñ ko dekhā jo Sabat ke din angūr kā ras nichoṛ kar mai banā rahe the. Dūsre ghallā lā kar mai, angūr, anjīr aur dīgar mukhtalif qism kī paidāwār ke sāth gadhoñ par lād rahe aur Yarūshalam pahuñchā rahe the. Yih sab kuchh Sabat ke din ho rahā thā. Maiñ ne unheñ tambīh kī ki Sabat ke din khurāk farokht na karnā.

¹⁶ Sūr ke kuchh admī bhī jo Yarūshalam meñ rahte the Sabat ke din machhlī aur dīgar kāī chīzeñ Yarūshalam meñ lā kar Yahūdāh ke logoñ ko bechte the. ¹⁷ Yih dekh kar maiñ ne Yahūdāh ke shurafā ko dāñṭ kar kahā, “Yih kitnī burī bāt hai! Āp to Sabat ke din kī behurmatī kar rahe haiñ. ¹⁸ Jab āp ke bāpdādā ne aisā kiyā to Allāh yih sārī āfat ham par aur is shahr par lāyā. Ab āp Sabat ke din kī behurmatī karne se Allāh kā Isrāil par ghazab mazīd baṛhā rahe haiñ.”

¹⁹ Maiñ ne hukm diyā ki jume ko Yarūshalam ke darwāze shām ke us waqt band kie jāeñ jab

darwāze sāyoṅ meṅ ḍūb jāeṅ, aur ki wuh Sabat ke pūre din band raheṅ. Sabat ke iḡhtitām tak unheṅ kholne kī ijāzat nahīn thī. Maiṅ ne apne kuchh logoṅ ko darwāzoṅ par kharā bhī kiyā tāki koī bhī apnā sāmān Sabat ke din shahr meṅ na lāe. ²⁰ Yih dekh kar tājiron aur bechne wāloṅ ne kaī martabā Sabat kī rāt shahr se bāhar guzārī aur wahān apnā māl bechne kī koshish kī. ²¹ Tab maiṅ ne unheṅ tambīh kī, “Āp Sabat kī rāt kyoṅ fasīl ke pās guzārte haiṅ? Agar āp dubārā aisā kareṅ to āp ko hawālā-e-pulis kiyā jāegā.” Us waqt se wuh Sabat ke din āne se bāz āe. ²² Lāwiyon ko maiṅ ne hukm diyā ki apne āp ko pāk-sāf karke shahr ke darwāzoṅ kī pahrādārī kareṅ tāki ab se Sabat kā din maḡhsūs-o-muḡaddas rahe.

Ai mere Ḳhudā, mujhe is nekī ke bāis yād karke apnī azīm shafqat ke mutābiq mujh par mehrbānī kar.

Ḡhairyahūdiyōṅ se Rishtā Bāndhnā Manā Hai

²³ Us waqt mujhe yih bhī mālūm huā ki bahut-se Yahūdī mardoṅ kī shādī Ashdūd, Ammon aur Moāb kī auratoṅ se huī hai. ²⁴ Un ke ādhe bachche sirf Ashdūd kī zabān yā koī aur ḡhairmulkī zabān bol lete the. Hamārī zabān se wuh nāwāqif hī the. ²⁵ Tab maiṅ ne unheṅ jhirkā aur un par lānat bhejī. Bāz ek ke bāl noch noch kar maiṅ ne un kī piṭāi kī. Maiṅ ne unheṅ Allāh kī ḡasam khilāne par majbūr kiyā ki ham apne beṭe-beṭiyōṅ kī shādī ḡhairmulkiyōṅ se nahīn karāeṅge. ²⁶ Maiṅ ne kahā, “Isrāīl ke bādshāh Sulemān ko yād kareṅ. Aisī hī shādiyōṅ ne use gunāh karne par uksāyā. Us waqt us ke barābar

koī bādshāh nahīn thā. Allāh use pyār kartā thā aur use pūre Isrāīl kā bādshāh banāyā. Lekin use bhī ḡhairmulkī bīwiyōn kī taraf se gunāh karne par uksāyā gayā. ²⁷ Ab āp ke bāre meñ bhī yihī kuchh sunanā parṭā hai! Āp se bhī yihī baṛā gunāh sarzad ho rahā hai. Ḡhairmulkī auratoñ se shādī karne se āp hamāre Ḳhudā se bewafā ho gae haiñ!”

²⁸ Imām-e-āzam Iliyāsib ke beṭe Yoyadā ke ek beṭe kī shādī Sanballat Haurūnī kī beṭī se huī thī, is lie maiñ ne beṭe ko Yarūshalam se bhagā diyā.

²⁹ Ai mere Ḳhudā, unheñ yād kar, kyoñki unhoñ ne imām ke ohde aur imāmoñ aur Lāwiyōn ke ahd kī behurmatī kī hai.

³⁰ Chunāñche maiñ ne imāmoñ aur Lāwiyōn ko har ḡhairmulkī chīz se pāk-sāf karke unheñ un kī khidmat aur muḡhtalif zimmedāriyōn ke lie hidāyāt dīñ.

³¹ Nīz, maiñ ne dhyān diyā ki fasal kī pahli paidāwār aur qurbāniyōn ko jalāne kī lakaṛī waqt par Rab ke ghar meñ pahuñchāī jāe.

Ai mere Ḳhudā, mujhe yād karke mujh par mehrbānī kar!.

Kitab-i Muqaddas
The Holy Bible in Urdu, Urdu Geo Version, Roman
Script

copyright © 2019 Urdu Geo Version

Language: (Urdu)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-05-06

PDF generated using Haiola and XeLaTeX on 11 Nov 2022 from source files dated 7 May 2022

123ff8cb-27b3-5817-a02a-22e67145fd30